

Date – 20/06/2025

Time - 18:30 Hrs

HEADLINES (EVENING)

1. Union Minister of State for Ministry of Road, Transport & Highways Pu Harsh Malhotra an Mizoram kawngpui chu cement concrete-a siam zel a ni tawh ang a ti.
2. Central YMA Kumpulan Committee leh Mizoram Police ten Dan loa sumdawng an dap.
3. Rampum huapa ruihhlo do beihpui thlakna Nasha Mukh Bharat Abhiyan pualin Lunglei District ah ruihhlo thatlohzia inzirtirna hun hman a ni.
4. Punjab leh hmar chhak bialah tunhnai khan ruihhlo chi hrang hrang thahnem tak man a ni.

<><><>

INDIAN ROADS CONGRESS

Union Minister of State for Ministry of Road, Transport & Highways Pu Harsh Malhotra an Mizoram kawngpui chu cement concrete-a siam zel a ni tawh ang a ti.

Ni hnih awh tur India ram chhunga kawngpui siam dan tur tehfung pawimawh hrang hrang duangtu Indian Road Congress Mid Term Council Meeting vawi 233-na Mizoram University Auditorium, Aizawla nghah a hmanpuinaah he thu hi sawiin Pu Malhotra-a chuan rigid pavement chu to zawk leh hun duh rei zawk ni mah se a that ber dawn thu a sawi a ni. Chief Minister Pu Lalduhoma chuan he hunah hian Mizoram National Highway atan cement concrete kawng, rigid pavement a mamawh tih a sawi a, Mizoram National Highway atan leilung leh ruah tui tlak tam ngaihtuahin rigid pavement a ngai a, Central Road Fund atangin cheng vbc 300 tal tun tangka kum kal mek atan hian a beisei thu a sawi a ni. Mizoram chu Myanmar leh Bangladesh nena inri a nih avang leh Act East Policy atana tangkai tak a nih avangin Mizoram kawng chu ngaih pawimawh bik a tul thu leh kawngpui atana sum lo kal turah pawh ngaihpawimawh hmasak a hlawh tir phah dawn thu a sawi.

PWD Minister Pu Vanlalhlana pawhin thu sawiin IRC Council chuan hmarchhaka kawngpui siam harsa leh danglam bik tak chungchang pawh uluk taka a ngaihtuah a beisei thu a sawi a. Hmarchhak ram leilung chuan ngaihsak bik a mamawh hle tih a sawiin hmarchhak kawngpui atan chuan rigid pavement-a siam kawngpui a that ber thu a sawi bawh a ni.

Indian Roads Congress hi highway engineer leh kawngpui siam lama professional hrang hrangte intelkhawm pawl niin kawngpui siam, lei dawh leh kawngpui hmanga inkalpawh chungchanga dan leh tehfung zawm tur hrang hrang - Indian Standards, Code, Manual leh adangte an duang thin a. Council meeting mai bakah, annual session, international seminar leh workshop hrang hrangte an buatsaih thin a. Tun tuma Mizoramin a thlen Mid Term Council Meeting-ah hian IRC Publication thar 5 tlangzarh a ni.

<><><>

SAMVIDHAAN HATYA DIWAS

BJP Mizoram State President Pu Vanlalhmuaka chuan kum 1975 June Ni 25 atanga kum 1977 March Ni 21 chhunga India rama National Emergency puan a ni chu India danpui palzutna leh mipuite dikna chanvo rahbeh sakna a ni a ti.

Vawiina Akashvani in a kawmnaah he thu hi sawiin Pu Vanlalhmuaka chuan India rama State of Emergency puan chuan India danpui palzutna, mipuite dikna leh chanvo rahbehsakna leh India democracy banpui palina hiala sawi chanchinbumite kut phuarsaka an awm phahna a ni a ti a. India democracy history-a hun thim ber nia an lo sawi thin pawh hei hian a dik zia a ti Chiang a ni a ti. Pu Vanlalhmuaka chuan Emergency laia Pi Indira Gandhi duh lotu zinga a hotu liante mana lungina dah luh nghal zel chu India ram democracy hun tawnga hun rapthlak leh thim chhah lai ber a ni a tih loh theih loh a ni a ti.

Pu Vanlalhmauka chuan he State of Emergency, India ram constitution tihboral ni a hman, Samvidhaan Hatya Diwas avangin a hun lain India ram ei leh bar dinhmun, trade union, hnathawktute dinhmun leh mimal zalenna leh dikna chanvo hrang hrang nasa taka tihngihin a nih thu a sawi a. Democracy ramah dictator ang maia sorkar kaihhruaina a nih thu sawiin khatiang kha a thlen tawh loh nan mipuiten an duh anga Constitution an siam hmanga India ramah rorelna a awm zel theihnan an ni Pu Narendra Modi-a kaihhruai BJP te chuan hma an lak zel dawn thu a sawi a, democracy chu par vul zel se duh thu a sawi bawk a ni.

<><><>

CYMA

Central YMA Kumpulan Committee leh Mizoram Police ten Dan loa sumdawng an dap. CYMA Kumpulan committee leh Mizoram Police tangkawp hian Aizawl khawchhung hmun thenkhatah, Hnamdang danlo a sumdawngte dapchhuakin he hunah hian ILP fello enfiah niin a fel lo chu thu neitu te kutah hlan an ni a. CYMA Vice President leh Kumpulan Chairman Prof. Lalnuntluanga chuan danlo a sumdawng Mizo hming hawh tir an awm thin thu leh Mizo mipuite tanrual a pawimawh thu sawiin Dan leh thupek kengkawhtute, Police te thawh pui thiama tan rual a tul tak zet thu a sawi a. A tul ang zela thuneitu te nen dan lo a sumdawngte endik chhun zawm an tum thu sawiin ram leh hnam himna atan Mizo mipuite tanrual a tul thu a sawi bawk.

<><><>

IDY

Mizorama Yoga hmang tangkaitu hlun tak te zinga mi Dr Balram Singh Pankaj chuan Yoga chu mihringte mamawh natna laka mihring taksa zalen tir theitu a ni a ti.

Vawiina Akashvaniin a kawmnaah he thu hi sawiin Dr Balram Singh Pankaj chuan Yoga chu a hriatna rei tawh mahse tihtakzeta a chhawr chhoh tan chu kum 2006 vel atangin a nih thu a sawi a. Yoga a hmelhriat atanga vawiin thlengin nitin Yoga exercise a lak thu a sawi a. Yoga chu taksa natna laka vengtu pawimawh tak a nih thu leh cancer natna, kal tha lo, thawk nuam lo te zawng zawng veng thei tu leh taksaah thisen kal kual ti tha thei tu a nih thu a sawi a ni.

Dr Balram Singh Pankaj chuan mihring taksa chu cell tluklehdingawn nuai 3 sing sarih chuanga siam a ni a, heng cell te hian taksaah boruak tha an dawn that chuan natna tan hmun a awm lo a ni a ti a. Taksa a boruak mamawh puhru turin Yoga exercise chuan nasa takin a pui thei a ni a ti a. Yoga chuan sakhaw hrang hrangte a thliar lo a, mi tupawhin an tih theih a nih thu leh sum leh pai ti hek bawk si lo a nih thu a sawi ni.

Dr Balram Sing Pankaj chuan International Day of Yoga (IDY)-ah Yoga exercise a tih leh ngei dawn thu a sawi a. Govt. Siaha Higher Secondary School Principal hna a thawh mek thu leh Aizawla IDY puala hun hman tur tam takah sawm ni mah se a tel ve theih dawn loh thu a sawi a. A remchan dan anga IDY chu a hnathawhna hmuna a hman ve dawn thu a sawi a ni.

<><><>

AIR NEWS

hanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve ah Chanchinthar puan leh a ni ang.

<><><>

Nasha Mukh Bharat ABHIYAN

Rampum huapa ruihhlo do beihpui thlakna Nasha Mukh Bharat Abhiyan pualin Lunglei District ah ruihhlo thatlohzia inzirtirna hun hman a ni. Lunglei District Social Welfare Officer Pu CL Joseph chuan zirna in hrang hrang leh Kohhranah campaign thin ani tih sawiin hengah hian mi thlan bik ten zirtirna an pe thin a ti a, International day Against Drugs abuse and Illicit Traffickling pualin Lungleiah sikul naupang tan intihsiakna hrang hrang a awm dawn tih sawiin zingkarah Walkathon buatsaih ani dawn a ti a, ruihhlo thatlohzia uar taka inzirtir ani dawn tih a sawi. Lunglei-a Chanchibu Editor Pu K. Lalrinpuia chuan a chanchinbu enkawl Vulmawi chanchibu kaltlangin Ruihhlo that loh zia an puanzar reng thu a sawi a, ruihhlo chu tih takzeta do a ngai tih sawiin theihtawp chhuaha mipuiin sawrkar an thlawp a ngaih thu a sawi bawk.

<><><>

DRUGS SEIZED

Punjab-ah vawiin khan BSF miten Amritsar-a thingtlang khaw pakhat bulah Methemphatamine Kg 7 an man a, hei hi tun hnaia ruihhlo man hnem ber tum a tling nia sawi a ni. An thudawn bawhzuiin BSF mite hiann nizan tlai tawh takah khan Amritsar leh Pakistan ramri hrula drone thlawk chu an kap thla a, drone-a ip dum lian tak inkhai chhungah ruihhlo hi a lo awm a ni.

Ram pum huapin ruihhlo do beihpui, ngawrh taka thlak chhunzawm zel a ni a, hmar chhak bial Customs Preventive officer-te pawhin Methamphetamine leh heroin, cheng vbch 30 leh nuai 17 an man a ni. Customs hian Mizoram leh Silchar inkar Panibhora-ah Mahindra Bolero pakhat atangin heroin nia hriat gram 885.56 leh methamphetamine mum Kg 15 an man a, Tripura-a Bachaibari bulah lirthei ke hnih nei khalhtu hnen atangin methamphetamine nia hriat Kg 4 an man bawk a, Agartala-ah methamphetamine Kg 4 an man bawk a ni.

Nagaland-ah pawh tunhnai khan ruihhlo cheng vbch 15 hu man a ni a, a kaihnawihah mi 5 man an ni bawk.

<><><>